

FA'AMATA'U FOU I LE PASEFIKA:

eliina o le sami loloto ma fa'amatalaina ni nofoaga fa'asao o le gataifale

O lo'o taumafai le kapineta o le Peresitene o Amerika ia Donald Trump, e tatalaina le ogasami o lo'o siomia ai le Pasefika i gaioiga po'o metotia e ono fa'aleagaina ai le gataifale. O lo'o lagolagoina e le ofisa o loia a le Earthjustice ni sosaiete eseese i Amerika Sāmoa ma isi nu'u o le Pasefika e tali atu i lenei tulaga. O lo'o matou fesoasoani i tagatanu'u o le Pasefika e puipui o latou gataifale, puipui measina fa'aleaganu'u, ma ia mautinoa le auai o tagatanu'u o le Pasefika i sa'ili'iliga ma fa'ai'uga a le feterale.



O se uga po'o se akau i le Rose Atoll Marine National Monument. (Pete Leary / USFWS)

Le uiga o le "deep sea mining"

O le eliina o le alititai po'o le sami loloto ("deep sea mining" i le gagana Peretania), o se tekinolosi fou e le'i fa'ata'ita'ina e fa'ailoa mai ai le fa'aputuina o minerale mai ni vaega loloto o le sami. E talitonu saienitisi e le mafai ona taofia, ma e le mafai ona toe fa'afo'isia pe a fa'aogaina i auala ua fuafuaina.

O nei metotia e aofia ai le aveeseina o ni ma'a mai le sami loloto e ta'u o le "polymetallic nodules." O nodules nei o ni ma'a e iai minerale tāua e pei o le manganese, cobalt, nickel, o lo'o sa'ilia e kamupani eseese o le lalolagi mo le fausiaina o mea fa'aeletoroni, ma'a ta'avale, auupega, ma nisi o tekinolosi. O nei fo'i ma'a e maua ai isi mea e ono lamatia ai le soifua maloloina o tagata.

O ai o latou lo'o lagolagoina le eliina o le sami loloto?

O le taugata o nei gaioiga, aemaise le lamatia o le gataifale ma le si'osi'omaga, ua fa'atapula'aina ai le atina'eina o alamanuia i tua atu o nai poloketi laiti su'esu'e. Ae o le tauaoga o nei minerale, ua tosina atu ai kamupani mai fafo ma fa'amatalaga fa'apitoa i le filifiliga o minerale.

I le taimi nei, e leai se kamupani eli i lalo o le sami i totonu o Amerika, po'o ogasami fa'avaomalo eseese o le lalolagi, ae ua talosaga nei kamupani i le malo tele o Amerika e fa'atagaina ma fa'atelevave le eliina o le sami loloto.

I le tausaga 2025, na tu'uina atu ai e le Peresitene ia Donald Trump se fa'atonuga e fa'atonu ai le Failautusi o le Initeria ma Pisinisi e aga'i atu i le tu'uina atu o pemitā i kamupani eli i le sami loloto i ogasami o Amerika ma fa'avaomalo.


E aofia ai ma fuafuaga e lisiina atu ai le silia i le 30 miliona eka o le ogasami feterale mai Amerika Samoa.

O lo'o tapena nei e le Ofisa o le Ocean Energy Management se fa'aaliga fa'ata'ita'i o se lisi a le malo tele o Amerika ma le Kamupani. O lenei lisi o le a fa'atinoina i se taimi lata mai i lenei tausaga 2026.

O a'afiaga o le eliina o le sami loloto

- Fa'aumatiaina o i'a ma isi meaola o lo'o aumau i le ogasami loloto, aemaise fo'i meaola fou e le'i fa'amaumauina e saienisi.
- Le fa'aleagaina o le alititai po'o le fogātai.
- Le fa'aeleelaina o le sami loloto e afaina uma ai vaega eseese o le ogasami po'o le "water column."
- Fa'aleagaina o i'a, tafolā, malie, ma isi meaola i minerale o'ona.
- Fa'aleagaina o amu e ala i le fa'a'asā.

O nei a'afiaga uma e afaina ai tagata Amerika Sāmoa.



O meaola o le sami loloto i Muliava, e aofia ai, mai luga i lalo, se i'a o le ituaiga o le Pontinus, se fe'e, ma se aveau i luga o se amu pami (bamboo coral). (NOAA Okeanos Explorer)

Le tāua o le puipuiga mo nofoaga fa'asao o le gataifale ma ogasami

O nofoaga fa'asao a le gataifale ma ogasami, ua fa'atulaga e puipui ma fa'asao nisi o fa'anatura o le sami. E lima nofoaga fa'asao o le gataifale e pulea e le malo tele o Amerika, e fā o lo'o i totonu o le itulagi o atumotu o le Pasefika.

I le masina o Aperila i le tausaga 2025, na sainia ai e le Peresitene o Amerika ia Donald Trump se folafolaga e tatala ai le nofoaga fa'asao o le gataifale o le "Pacific Island Heritage Marine National Monument" mo faigafaiva fa'apisinisi. Na fa'auluina e le fa'apotopotoga o le Earthjustice se tagi i le vaega o le fa'amasinoga i Honolulu, Hawai'i, e taofia ai lenei fa'amoemoe ina ia puipui ai aia tatau o tagatanu'u. Sa fa'amanuia ma tali lelei le talosaga a le fa'apotopotoga a le Earthjustice e ala lea i se fa'ai'uga mai le fa'amasinoga e toe fa'asaina ai faigafaiva fa'apisinisi.

O le puipuiga o Muliava ma Rose Atoll Marine National Monument

I le masina o Iuni i le tausaga nei 2026, na sainia ai e le Peresitene ia Donald Trump se folafolaga e tatalaina ai nisi o nofoaga fa'asao o le gataifale i faigafaiva fa'apisinisi. O nofoaga fa'asao na fa'atatau i ai e aofia ai le **Rose Atoll Marine National Monument**, fa'apea fo'i ma le Papahānaumokuākea Marine National Monument i Hawai'i ma le Mariana Trench Marine National Monument i Northern Mariana Islands.

O lenei folafolaga fa'alia mai le Peresitene o Amerika ia Donald Trump, o le a fa'atagaina ai faigafaiva fa'apisinisi i totonu o Rose Atoll Marine National Monument. O lenei fa'atagaina o faigafaiva fa'apisinisi, o le a aveesea ai le tele o i'a ma isi meaola o le gataifale.

Ua leva ona feagai o tatou sami ma le fa'amata'u mata'utia mai le suiga o le tau. O faigafaiva fa'apisinisi i nofoaga fa'asao e fa'apopoina ai le fa'aleagaina, e o'o lava i faigafaiva fa'apisinisi mo taimi pupu'u e mafai ona afaina ai le gataifale.

O nei nofoaga fa'asao o le gataifale, e puipuia ai measina o le sami loloo o le tatou ogasami. O lenei ogasami, sa soifua mai ai o tatou tagata mai aso anamua, lea ua tatou taunu'u mai ai i lenei aso. O le puipuiga o le tatou gataifale, e fesoasoani fa'ateleina ai meaola fa'anatura o le sami, ma fesoasoani e puipuia i latou mai fa'amata'u e pei o suiga o le tau.